


Izjava prvog zamjenika visokog predstavnika Raffija Gregoriana



U Bosnu i Hercegovinu sam došao kao pripadnik SFOR-a 1998. godine sa zadatkom da pomognem specijalnim snagama koje su radile na praćenju i hapšenju lica optuženih za ratne zločine. Od tada, pred lice pravde izvedeno je 159 od 161 lica optuženih od strane Međunarodnog krivičnog tribunala za bivšu Jugoslaviju. Od kada sam se vratio u Bosnu i Hercegovinu, kasnije te godine, kao dio programa 'Obuči i opremi' namijenjenog za Vojsku FBiH, hapšenje odgovornih za ratne zločine i genocid je moj glavni prioritet – jer ovi zločini su zločini protiv čovječnosti u cjelini, protiv svih nas. Ovi zločini su za mene lično užasavajući. U potpunosti odbacujem izjave onih koji poriču ono što se dogodilo ovdje u Srebrenici. Veoma sam zadovoljan da se jučer cjelokupna međunarodna zajednica u Bosni i Hercegovini udružila kako bi osudila takve izjave.

Irski politički filozof Edmund Burke je zaslužan za oštroumnu opservaciju da «jedina stvar koja je potrebna za trijumf zla jeste da dobri ljudi ne urade ništa.» Prije petnaest godina civilizirani svijet nije uradio ništa, ljudi su ubijeni i počinjen je genocid.

Žene koje su ožalošćene 15 godina žive dostojanstveno i traže pravdu. One žele da oni koji su odgovorni za ovaj zločin odgovaraju i žele da oni koji su nastradali dobiju

dostojanstven ukop. Pojedinac koji je drugi po redu najviše kriv u ovom slučaju, Ratko Mladić, u bjekstvu je kao obični kriminalac, ali on je nadohvat ruke. Međunarodna zajednica i naši partneri u domaćim sigurnosnim agencijama imaju kapacitete da krenu za mrežama koje ratnim zločincima omogućavaju da ostanu na slobodi. Mi znamo ko su oni i šta rade. Nastavljanje sa pritiscima će pomoći Srbiji da ispuni svoje obaveze prema MKSJ.

Reći «nikada više» je besmisleno ukoliko *ne učinimo* ništa. Zlo *zaista* postoji i genocid bi se *mogao* desiti ponovo na nekom drugom mjestu ukoliko ne budemo krivično gonili one koji su odgovorni za genocid koji se desio ovdje. Ja ću nastaviti da radim sve što je u mojoj moći, kao čovjek, kao građanin SAD-a, i kao zvaničnik vlade, da osiguram da pravda bude zadovoljena.

Želim da iskoristim ovu priliku da iskažem svoje iskreno saučešće ženama, preživjelim iz Srebrenice.

Žalim što nismo uhapsili Ratka Mladića tokom mog mandata, ali sam uvjeren da će se on suočiti sa pravdom, na ovom svijetu i na drugom svijetu.

Svi oni koji vjeruju u pravdu – pravdu koja je slijepa za nacionalnost, pravdu koja je u potpunosti nepristrasna – moraju progovoriti protiv svakog poricanja genocida koji se desio ovdje. Ovakvo poricanje je van granica civiliziranog društva. Civilizirano društvo mora okrenuti leđa onima koji ovo poriču, oni su dio prošlosti, dio stoljeća genocida koje smo ostavili za sobom.